

Tewas godaan SUAMI ORANG

Sukar tolak huluran cinta jiran sebelah rumah



**BERSAMA
KAUNSELOR**

**Pn Siti Fatimah
Abdul Ghani**
Kaunselor Berdaftar
Seksyen Kaunseling
Pelajar, Universiti
Putra Malaysia

? Perasaan cinta itu hadir tanpa diduga. Bermula dengan sapaan biasa, saya dalam diam bercinta dengan jiran sebelah rumah yang sudah berkahwin. Sehingga ke hari ini, tiada seorang pun menghidu perhubungan kami. Saya sedar, perhubungan ini sukar, namun tidak tahu apa harus dilakukan. Jujur saya mengakui hubungan ini sudah sampai ke tahap intim dan kami beberapa kali terlanjur.

Kami mempunyai cara tersendiri untuk keluar bersama. Dia akan menghubungi saya menerusi Facebook jika

ada perancangan untuk berjumpa.

Saya kini berasa serba salah dan berasa berdosa atas apa yang berlaku. Namun, terus terang saya katakan sukar untuk menolak ajakannya keluar ketika ada masa terluang dan tidak disyaki sesiapa.

Kami berjumpa di beberapa tempat berbeza, malah sehingga ke bilik hotel walaupun hanya untuk beberapa jam. Saya ingin berubah dan ingin melupakan apa yang berlaku.

**HILANG HARGA DIRI,
Kedah.**

! Terus terang, perkongsian ini boleh memberi manfaat kepada semua terutama diri anda. Saya mengucapkan terima kasih atas kesudian dan kerelaan untuk

berkongsi isu sosial dengan saya.

Sesungguhnya setiap sesuatu itu adalah permulaan bagi sesuatu yang lain. Saya cukup optimis luahan ini mampu memberi celik akal kepada mereka yang lain.

Sungguh, kita berasa sedikit terbeban dengan isu sosial dan moral masyarakat terutama yang beragama Islam. Namun, saya mendoakan kebaikan dan kerahmatan Allah buat anda untuk terus istiqamah dan membersihkan diri daripada perkara yang haram dan noda.

Paling utama, kesediaan berkongsi di ruangan ini adalah petanda perubahan nilai dan tingkah laku awal. Ia petanda baik kepada anda.

Saya berasa terpenggil untuk memperihalkan erti cinta yang sebenar-benarnya. Kecintaan paling agung sudah tentunya kepada Allah.

Tidak salah untuk mempunyai rasa cinta dan sayang kepada seseorang, namun biarlah ia berlaku mengikut apa yang disyariatkan Allah.

Ada beberapa perkara utama perlu diperincikan sebaik-baiknya mengikut lunas keagamaan dan akhlak.

Pertama, perhubungan rahsia dan terlarang. Ia menjadi rahsia antara anda dan jiran terbabit. Sungguh, ia terlindung oleh pengetahuan keluarga, namun tiada rahsia dengan Allah.

Setiap yang berlaku adalah sandiwara nafsu yang wujud secara tidak sedar. Dan inilah yang perlu dibanteras serta diuruskan sebaiknya.

Fikirkan apa yang akan berlaku sekiranya hubungan terlarang disudahi dengan mengandung luar nikah? Jika tidak mengandung sekalipun, apa kesannya terhadap maruah diri dan kesihatan?

Istighfar banyak-banyak atas apa yang berlaku. Sedarilah dia suami orang. Walaupun tidak diceritakan bilangan anak, beliau tetap suami orang.

Kecurangan berlaku tanpa pengetahuan isterinya. Inilah nilai moral yang perlu diberi perhatian agar tidak mengganggu kerukunan rumah tangga.

Penyebabnya adalah hu-

bungan kalian, bermaksud tanggungjawab anda berdua dalam mewujudkan situasi hubungan terlarang ini.

Keduanya, isu keterlanjuran. Hakikat yang perlu anda terima ialah perbuatan ini haram di sisi agama dan ia adalah zina.

Saya kira anda sudah mengetahui hal ini, namun sukar mengawal ajakan hawa nafsu. Di sinilah konflik berlaku antara nilai keagamaan dan keimanan dengan nafsu seks.

Meskipun ia haram dan terlarang, Allah masih menjaga aib kalian dengan tidak dicekup oleh mana-mana pencegah maksiat. Tandanya, anda masih diberi peluang untuk bertaubat dan kembali ke pangkal jalan.

Sesungguhnya larangan melakukan zina itu sudah terang-terangan terkandung dalam kitab suci al-Quran. Sudah pasti larangan itu bersifat mutlak.

Ketiganya, keraguan anda sendiri terhadap hala tuju perhubungan. Adakah ia bersifat sementara hanya untuk melampiaskan nafsu atau bersifat kekal dan mempunyai perancangan sehingga ke gerbang perkahwinan?

Jika anda ingin berubah, kenal pasti gangguan emosi yang menyebabkan anda terdorong mengikut hawa nafsu.

Adakah dalam situasi ini

anda benar-benar dicintai atau sekadar menjadi teman tidur sementara buat kekasih gelap yang juga suami jiran anda sendiri?

Adakah ini caranya yang benar untuk menunjukkan rasa cinta dan adakah ini sifat lelaki yang mampu memberikan kebahagiaan buat anda? Tepuk dada, tanya iman.

Banyak perkara yang boleh difikir dan dilakukan. Cuba bayangkan, berapa lama anda menghabiskan masa dengan perbuatan terlarang ini? Berapa lama juga anda membenarkan diri berada dalam situasi ini tanpa pengetahuan yang lain terutama ibu dan ayah.

Ternyata, sungguh sukar untuk anda menjawab setiap persoalan ini. Namun, sesukar mana pun persoalan ini bukan hal yang penting.

Apa yang perlu ialah kesadaran untuk kembali ke pangkal jalan dan memaksimumkan keimanan diri dengan bertakwa kepada Allah.

Untuk masa terdekat, hindari daripada berhubung dengannya. Berterus-teranglah kepadanya jika anda benar-benar insaf dan ingin memutuskan perhubungan.

Seboleh-bolehnya, jangan aktifkan akaun Facebook anda atau apa-apa jua sumber media sosial yang digunakan dalam perhubungan.